

# “Arjonjer” pòssen nce tres l bal danter ert y critica soziela

Canche l'ert y la sozietà se mescèida: l bal cuntemporan coche mesun de critica. “Arjonjer”, chësc ie l titul dla performance de bal che ie stata nstadi a Urtijëi

**Ert** - Da canche l ie la jënt sun chësc mond muessela y uel ëila cialé de sëuraviver. La jënt ulëssa for arjonjer deplù, vester danora. Ie pa chësc la prescion dla sozietà che nes fej pensé nscila o iel pa zeche che la persones à for bele abù tl istint? Da ulà ven pa chësc pensier de messèi for for vester miëur, nce sce l ne muessa nia for vester y l ne n'ie niancanó sann? Chësta dumandes se à fat l'artista jëuna Anastasia Kostner ntan che la ie stata a Londra y Amsterdam, dantaldut do che la ova mparà a cunëscer jënt che ova abù n burnout.

Nsci à ëila cris ora chësta tematica deberieda cun la cumpania Fucinadanza, che ti à dat l mesun de fé chësc proiet.

## L bal cuntemporan

L bal de esprescion ne n'ie da nëus nia scialdi cunesciù. Nsci à Anastasia Kostner, la balarina jëuna de Urtijëi

che léura y viv a Amsterdam, purtà si léur a Urtijëi, “ajache l ie mpurtant a mustré chësta forma d'ert nia mé te de gran ziteies,” da coche l ie uni dit.

Kostner dij che per uni forma de bal iel nce na referenza storica y perchël iel stat mpurtant per ëila à cri na forma che reprejente la sozietà d'al didancuel. Per ëila ie l balé na forma de esprescion cun chëla che n possa datrai cunté deplù che mé cun paroles. L bal cuntemporan ie nasciù per ji contra l balet tlassich. La regules dl bal ie plu liedies. L ie muvimènc for autramènter y nueves, che ti va suvènz do a n ritm de na meludia moderna.

à metù adum na coreografia y à fat, n venerdì sëira ai 16 de nuvèMBER te Cësa di Cungresc Urtijëi, la prejentazion che toca pra l festival “Alps Move.”


Dala ot da sëira se àl ancuntà na bela cumpèida de jënt per se goder la manifestazion.

## Na atmosfera particulera

L publich ie stat scialdi ntujast de chësc bal y ti à fat n gran aplaus ai balarins. Ntan duta la performance iel stat na atmosfera scialdi particulera, belau senestra sce n possa di nscila, dantaldut nce tres la mujiga, che ti à dat a duc canc la ueia de pensé do. I balarins ie sfac boni de mustré cieche fova si nteziens de critica. La raprezentazion ie scialdi garateda y n se ntënd propi dl savèi artistich di balarins. Cumplimènc!

## La performance di balarins

I balarins Anastasia Kostner, Camilla Bundel, Christian Guerematchi y Riccardo Meneghini



I balarins dla performance “Arjonjer” purteda dant a Urtijëi. Da man ciancia: Riccardo Meneghini, Anastasia Kostner, Camilla Bundel y Christian Guerematchi.

Julia Lardschneider